

Ayera tardi na Seaport Marketplace:

INTERESANTE APERTURA DI EXPOSICION DI PINTURA, POTRET Y ESCULTURA



ORANJESTAD (AAN) -- Ayera pa 6'or di atardi a tuma lugar na Sea Port Marketplace un interesante exposicion di pintura y escultura, cu enfasis riba hende muher, bao auspicio di Ministerio di Salubridad Publico, Cultura, Asuntonan Social y Deporte, en coordinacion cu Instituto di Cultura, cual a worde dedica na e inolvidable dama Arubiana Laura Wernet Pasquel (q.e.p.d), cu tabata e prome muher cu a sali na defensa di derechonan di hende muher na Aruba.

Prome cu apertura di e exposicion cual tabata na encargo di Ministro Lili Beke, Evelino Fingal, director di Instituto di Cultura a hiba palabra, y seguidamente e hoben cantante Ericka Giel (subrina di e famoso soprano Tica Giel) a interpreta varios wals Arubano. Ta bon pa acentua cu Ericka a impresionar e publico presente cu su maraviyoso voz.

Despues di un breve discurso Ministro Lili Beke a haci apertura di e exposicion, y

seguidamente un grupo di danza bisti na preto y cu mascara a dramatiza e tema di un di e obranan cu a ser presenta. Tambe ta forma parti di e exposicion potretnan di sra. Laura Wernet Pasquel, cual material a worde proporciona pa su yiunan. Den e sala di exposicion por a aprecia cuadronan di 22 artista, unda lo divino, lo hu-

mano y e naturaleza mes ta forma parti di e diferente manera con nos artistanan local ta visualiza e ser femenino.

Representantenan di gobierno y Parlamento, y un grupo grandi di invitado a haci acto di presencia na e actividad interesante aki, riba cual DIARIO lo bin cu mas detaye.